

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 30. Abrëll 2020

Här President,

sou wéi d'Chambersreglement et virgesäit, bieden ech lech, dës **dréngend** parlamentaresch Fro un den Här Schoulminister weiderzeleeden.

Den Educatiounsministère huet den 28. Abrëll 2020 e Bréif un d'Enseignanten an d'Schoulpersonal aus dem Enseignement fondamental erausgeschéckt, an deem déi Persoune gebiede ginn, bis zum 1. Mee 2020 e Formular auszufüllen, fir vulnerabel Persounen ze identifizéieren. D'Enseignanten hunn dee Bréif de 29. Abrëll kritt.


Déi Leit, déi selwer vulnerabel sinn oder esou Leit an hirem Stot hunn, mussen, fir dat ze beleeden, e medezineschen Zertifikat vun engem Dokter bäileeën, respektiv, zousätzlech en Zertifikat iwwer d'Kompositioun vun hirem Menage.

Déi concernéiert Leit hunn also de facto grad een Dag fir déi Pabeieren ze produzéieren, woubäi ee muss bedenken, datt déi selwecht Regierung, déi dee Bréif verschéckt huet, eng virsiichteg Reprise vum Exercice médical an den Dokteschpraxissen eréischt vum 4. Mee un autoriséiert.

Dowéinst wollt ech dem Här Educatiounsminister dës dréngend Froe stellen:

1. Wéi koordinéiert d'Regierung hir Aktivitéiten, besonnesch och am Hibleck op d'Relance an de Schoulen?
2. Firwat kréien d'Leit hei en Delai vu nëmme ronn 24 Stonne gesat, wa jo kloer ass, datt am Abléck den Delai net kann duergoe fir déi gefroten Dokumenter ze produzéieren?
3. Wëll d'Regierung den Delai net an engem vernënftege a realistesch Mooss verlängeren?

Mat déiwem Respekt,



Fernand Kartheiser
Deputéierten

Le caractère urgent de la question a été reconnu (30.04.20)

Äntwert vum Minister fir Educatioun, Kanner a Jugend op d'parlamentaresch Fro Nr. 2122 vum honorabelen Här Deputéierte Fernand Kartheiser

Ad 1)

De Regierungsrat huet de 15. Abrëll 2020 d'Mesuren, mat deenen de Deconfinement an d'Weeër geleet gëtt, decidéiert an dee Moment och nach eng Kéier ënnerstrach, datt besonnesch déi vulnerabel Persounen misste protegéiert ginn.

Fir een optimalen Oflaf vun der Reprise vun de Coursen an de Lëtzebuerger Grondschoulen ze assuréieren, d'Ëmsetzung vum Enseignement en alternance sécherzestellen a prioritär d'Membere vun der Schoulcommunautéit ze schützen, goufen a ginn aktuell vu Säite vun den zoustännege Servicer geziilt Informatiounen bei den eenzelne Membere vun der Schoulcommunautéit gefrot.

De Ministère vun der Fonction Publique huet den 18. Abrëll 2020 de Service Ressources humaines vu mengem Ministère doriwwer a Kenntnis gesat, datt ee Recensement vun den Agenten, déi als vulnerabel ze consideréiere sinn, misst virgeholl ginn. De Service RH huet doropshin dës Informatiounen den Dag drop un all d'Servicer aus mengem Ministère weidergeleet.

No Récksprooch mam Gesondheetsministère huet den zoustännege Service aus mengem Ministère den Direktere vun de Regionaldirektiounen den 21. Abrëll 2020 matgedeelt, datt vun dësen eng Enquête fir d'Ermëttele vun den Enseignanten an dem sozio-edukative Personal, déi als vulnerabel Persoun ze consideréiere sinn, misst gemaach ginn an dobäi goufen déi eenzel Informatiounen, déi fir d'Ëmsetze vum Recensement vun de concernéierten Agenten néideg waren, präziséiert. D'Direkteren hunn duerno zesumme mam Centre de Gestion informatique de l'Éducation (CGIE) een Onlineformulaire ausgeschafft, fir d'Enquête am Respekt vun den Dateschutzbestëmmungen duerchzeféieren.

Ech ënnersträichen hei déi virbildlech Zesummenaarbecht vun den involvéierte Ministèreren a Servicer, déi dank der gudder Koordinatioun fir ee séiert Ermëttele vun den Agenten, déi als vulnerabel ze bezeche sinn, gesuergt hunn.

Ad 2+3)

An engem Schreiwes, dat den Agenten, déi an de Lëtzebuerger Grondschoulen intervenéieren, informatesch zougeschéckt gouf, goufen dës opgefuedert, bis den 1. Mee 2020 een Onlineformulaire auszufüllen, fir esou an engem éischte Schrëtt déi Persounen ze ermëttelen, déi als vulnerabel ze consideréiere sinn. Am Kader vun dësem Onlineformulaire hu missten eenzel Donnéeën saiséiert ginn, mat deenen den Agent bei der Auswärtung konnt identifizéiert ginn an duerno hu si eng Rei vu Froen misse beäntweren, bei deenen d'Äntwert an der Reegel huet missen aus méi Proposen ugewielt ginn. Den Opwand fir d'Ausfëlle vum Formulaire gouf als geréng a wéineg zäitopwändeg ageschat.

D'Agenten hu missen uginn, ob schonn en Zertifikat vun engem Dokter géing virleien, dee beleet, datt si als vulnerabel Persoun gëllen, mä natierlech muss dësen eréischt an enger zweeter Etappe bis spëtstens de 25. Mee 2020 eragereecht ginn. Esou ass séchergestellt, datt d'Enseignanten an dat sozio-edukatiivt Personal eventuell bei hiren Dokter e Rendez-vous kënnen huelen, fir een entspreche Certificat médical ausgestellt ze kréien.